

საშუალო მეტოქე და სასარგებლო გაკვეთილი

თბილისი. „დინამოს“ სტადიონი. 21 აგვისტო.

„დინამო“ (თბილისი) – ირანი (ნაკრები) 2:1 (1:0).

„დინამო“: კოტრიკაძე, ბ.სიჭინავა, რეზვიაშვილი, ჭელიძე, ცხოვრებოვი, გ. სიჭინავა (ბარათაშვილი), ილიაძე, ხუციშვილი, იამანიძე, მეტრეველი, დათუნაშვილი.

ირანი: ზელი (ბაიათი), ქელიზ-ხანი, ჰაბიბი, რანჯბარი, მეზრობი, არაბი, შირზადეჩანი (ჯაბორი), ესმოილი (ფარმაზი), თალები, ბეზადი, ეფმიჰარი.

მსაჯი ტ. ბახრამოვი (ბაქო).

დიდი ხანია არ უნახავს თბილისელ მაყურებელს საერთაშორისო მატჩი ფეხბურთში, სადაც დინამოელთა მეტოქე იქნებოდა ხეირიანი უცხოური კლუბი ან რომელიმე ქვეყნის ნაკრები გუნდი. 1962 წელს თბილისში იმყოფებოდა შოტლანდიის „გლაზგო რეინჯერსი“, ცნობილი, ძლიერი კლუბი, რის შემდეგ კარგი გუნდი ჩვენთვის უცხო ხილად იქცა.

გუშინწინ დინამოელებმა თავიანთ მინდორზე მიიღეს ირანის ეროვნული ნაკრები. გულახდილად რომ ვთქვათ, დღევანდელი საერთაშორისო ფეხბურთის ელიტაში არც ეს გუნდი ირიცხება, მაგრამ, ჩვენი აზრით, განვილილმა მატჩმა ზოგიერთი საყურადღებო და სასარგებლო რამ შესძინა თბილისელებს.

ამ „ზოგიერთიდან“ გვინდა გამოვყოთ 2 ძირითადი მომენტი:

პირველი. რა თქმა უნდა, თამაშის საერთო კლასით, ცალკეულ მოთამაშეთა სიძლიერით ირანელები ვერ მოვლენ თბილისელებთან, ტექნიკაშიც, სისწრაფეშიც განსხვავება საგრძნობი და ხელსახეობა, მაგრამ წინააღმდეგობის გაწევის უნარი, მცველთა ანსამბლის მოქმედება სახიფათო მომენტებში და საერთო სათამაშო ტონუსი ირანელებს სანიმუშო აქვთ. მეტრეველის, გ. სიჭინავას, **იამანიძის** მიერ შესრულებული რთული ელემენტები შემდგომ გაგრძელებას ვერ პოულობდა იმის გამო, რომ სტუმრები თავგანწირვით თამაშობდნენ, ერთდროულად იყვანდნენ მტკიცე მარწუხებში როგორც თვით დრიბლიორს, ე.ი. ბურთის მფლობელ ფეხბურთელს, ისე მის შესაძლო პარტნიორებსაც კომბინაციის გასაგრძელებლად. მათი კონტრილეთები სრულდებოდა ზუსტად, სწრაფად, და რაც მთავარია, დროულად.

მეორე. რომ შევადაროთ თბილისელთა მიერ უშუალოდ მეტოქის კართან შექმნილი სახიფათო მომენტი ირანელებისას, განსხვავება საკმარისზე მეტია „დინამოს“ სასარგებლოდ. შეფარდება დაახლოებით გამოიხატება ციფრებით 5:1. შეტევათა ეფექტურობაც რომ ასეთივე პროპორციით დამთავრებულიყო, დინამოელები მატჩს მინიმალური განსხვავებით კი არ მოიგებდნენ, არამედ უფრო დამაჯერებლად. მიზეზი? მიზეზი კი ისაა, რომ ჩვენი თავდამსხმელები უამრავ ხელსაყრელ მომენტს კარგავდნენ მოპირდაპირე საჯარიმო მოედანზე, ჩვენი მოწინააღმდეგეები კი – არა, ის გოლიც, რომელიც ირანელებმა გაიტანეს „დინამოს“ კარში, სულ არ წარმოადგენდა სახიფათო იერიშის შედეგს. გაიხსენეთ ეს გოლი: ეფმიჰარიმ 62-ე წუთზე დაახლოებით 35 მეტრიდან მოულოდნელად დაარტყა კარში, კოტრიკაძე გამოთიშული აღმოჩნდა თამაშიდან და ვერ შეძლო ბურთის აღება. ეს თითქოს უბრალო, მაგრამ ჩაფიქრებული და დამუშავებული მანევრი ჩვენმა სტუმრებმა რამოდენიმეჯერ გამოიყენეს, 1 ბურთი ფარმაზიმ ძელს მოახვედრა და რამდენიმეც ოდნავ აცდა კარს. ყოველი დარტყმა შესრულებული იყო შორიდან, მოულოდნელად, დინამოელები კი, როგორც წესი, უშედეგოდ ურტყამდნენ ახლოდან 8–12 მეტრის მანძილიდან.

საერთოდ, მატჩი ირანის ნაკრებთან თბილისელებმა ვერ ჩაატარეს დამაკმაყოფილებლად. არ იყო ტემპი, არც მონდომება ჩანდა. „დინამოს“ თამაში უფრო რიგით საწვრთნელ ვარჯიშს ჰგავდა, ვიდრე საერთაშორისო შეხვედრას.

და მაინც გამარჯვება მოპოვებულ იქნა. პირველი გოლი მე-14 წუთზე გაიტანა დათუნაშვილმა, ხოლო მეორე – მეტრეველმა 47-ე წუთზე. საპასუხო გოლი ჩვენს მიერ ადრე იყო აღწერილი.

ბ.ქორქია.

„ლელო“ 23 აგვისტო 1966 წ.